



Heio-gjerdet ligg framleis nede

Om få dagar er det 2 månadar sidan ein sjåfør mista styringa og køyrde ned hjørnet av gjerdet rundt idrettsplassen på Heio. Men framleis er ingenting gjort for å rette opp att og reparera gjerdet.

Oppsittarar i området undrar seg over det og spør uskedalen.no kvifor det ikkje er gjort noko.

Leiar i idrettslaget Bjarne Lilleaas kan ikkje på sparket svara på kvifor gjerdet ikkje har kome opp att. Men han lovar at det skal skje snart og seinast i samband med dugnaden i slutten av april.

Seinare opplysar Odmund Soldal at jobben med reparasjonen er sett bort til Brødrene Musland og at dei startar fredag.

Bilen køyrde rundt 50 meter utanfor vegen og over jordet før den traff gjerdet. Sjåføren forklara utforkøyringa med at det var mykje snøslaps i vegen då uhellet skjedde på morgonkvisten 4. februar.

Han opplyste at både han og bilen var heilt uskada. Sjåføren tok etter stutt tid kontakt med idrettslaget og beklaga hendinga. Det vart også teke kontakt med forsikringsselskapet.

Tekst og foto: Ola Matti Mathisen